

1. Flupland vò de Ramp.

2. D'r is de lesten tied vee te doe gewist over de weegbrugge van Flupland en dat is te begriep, want die mò bluuve.
3. 't Is een herinneringspunt dat à bie Flupland 'oôrt.
4. Vlakbie de weegbrugge 'ao je 't pak'uus, daer wier graen, aerepels en kunstmis opgesloge.
5. Een jaer of wat geleeje 'eit 'r oak spraeke van gewist à de kaoie geslote zou woôre.
6. Je mot 'r toch nie an dienke à dat zou gebeure.
7. Vroeger reeje de boerewaegens of en an mee suukerpeeën, aerepels en graen.
8. Alles wier mee d'and gelost, zwaer werk was dat 'oô.
9. In die jaeren stonge d'r op d'n Oôsdiek een 'eêle rij 'uuzen en oak wat wienkeltjes d'r tussen.
10. 't Eêne 'uus mee de voordeure nae d'n diek, mè d'r waere oak 'uuzen daer à je vanaf d'n Dulf in most.
11. Wienkeltjes waere d'r in 't 'eêle durp te vinde, soms zomè in een ziekaemertje of een achter'uusje.
12. Op de Voorstraete, dae weunden j' op stand.
13. Dae was oak café de Druuvetros, d'ontmoetiengsplekke vò de riekere mensen.
14. Vlakbie de meule stong 't wachtje, noe is dae 't ouwemannekotje.
15. In 't Karreveld weunden d' errebeiers.
16. Achter d' uuzen stonge de vaerekeskoten en de plee was oak buiten.
17. 't Was een gemoedelijk buurtje, de mensen 'ielepe mekaore à 't noôdig was.
18. Vanaf 't Schooldreefje nae de Voorstraete was een prachtig laentje, 't Kerkdreefje wier dat genoemd.
19. Meziekverênigieng Concordia, die à dit jaer 'onderdentien jaer bestaet, speelden daer mee Konehinnedag op de mezieltente.
20. De weegbrugge woôr opgeknaapt en daer bin me op Flupland blie mee.